

**COLUMNA**

# Jau aveva 17 onns...

 LAURA SCHÜTZ/FMR
 

---

**A** l'entschatta da la pandemia aveva jau 17 onns – ussa hai jau prest 20. Jau sun pia daventada creschida durant il temp da corona.

**J**au ma regord anc bain dal venderdi da mars avant prest dus onns. Gist turnada d'ina emna da project a Bienna, hai jau retschavi la novitad che la scola vegnia serrada l'emna che suonda. Quai pareva fitg surreal en quest mument. Ussa ma pari che quest di è stà avant decennis.

**A** l'entschatta era l'entira chaussa en in curius senn anc aventurusa. Jau aveva l'impressiun d'esser per l'emprima giada involvida en insatge che pertutga l'entir mund. Igl era l'emprima giada che mia vita e mes plans eran vegnids mess complettamain sutsura. Jau pensava che tut vegnia bain-spert ad esser passà.

**Q**uai n'è betg capità. Svelt è la pandemia daventada il tema numer 1 per smalltalk e discussiuns pli lungas. Suenter avair gi da scriver in «text davart corona» en rumantsch, tudestg, englais e franzos en scola aveva jau definitiva-main avunda da la tematica.

**D**urant il temp da homeschooling hai jau savens pensà al proverbi «Sei vorsichtig mit deinen Wünschen, sie könnten in



Erfüllung gehen». N'aveva jau betg giavischà d'avair dapli temp liber, dapli temp per mia lavur da matura? Jau vuleva era adina ina giada avair scola da chasa anora, simplamain per savair co che quai è. L'onni avant n'era jau betg stada a chasa a mes anniversari pervia d'in viadi da studi ed aveva giavischà da pudair festivar il proxim onni a chasa. Da mes 18avel natalizi era jau lura propi a chasa – dapli a chasa che spetgà.

**S**avens audan ins ch'ils giuvenils e las giuvenilas sco jau pateschian il pli fitg da las restricziuns. Jau crai che quai constettia bain, dentant mo per part.

**S**che jau udiva da las temas existenzialas da fatschentas u da geniturs cun uffants pitschens che stuevan lavurar da chasa anora, aveva jau schleta conscienza. Jau aveva schleta conscienza d'avair en quella situaziun il sentiment da betg vulair manchentar insatge. Cunquai ch'ins ha

en mia vegliadetgna anc pli paucas obligaziuns, aveva la giuventetgna pli probabel era pli pauc quitads.

**D**a l'autra vart constatti bain ch'ins fa en quella vegliadetgna experientschas per la vita che na sa laschan betg spustar. Per ils uffants pitschens n'è per part forsa gnanc sa midà uschè blier, uschè ditg ch'els ed ellas pudevan anc termagiar cun vischins u fragliuns. Glied creschida stueva durant il lockdown era spustar termins, quels sa laschavan però savens prender suenter. Al cumenzament era jau trista che blers eveniments, sin ils quals jau m'era gia legrada daditg, èn vegnids stritgads. Mes viadi da matura n'ha per exempel betg gi lieu en la medema furma.

**C**un il temp è la situaziun dentant daventada bunamain normala per mai. Senza corona avess jau franc vivì ils davos dus onns complettamain auter. Ma tut na fiss segir betg ex-num stà meglier u pli bel. En mintga cas hai jau ussa in'istorgia che jau poss raquintar in di a mes biadis ed a mias biadias.

**A** l'entschatta da la pandemia aveva jau 17 onns – ussa hai jau bainbaud 20.

**Laura Schütz ha terminà il gimnasi la stad passada. Actualmain fa ella in onni intermediar, durant il qual ella lavura era sco redactura tar la FMR.**